

**CONVENIO DE COLABORACIÓN ENTRE O SERVIZO GALEGO DE SAÚDE E A
UNIVERSIDADE DE SANTIAGO DE COMPOSTELA (USC) PARA O
DESENVOLVEMENTO DAS ACTUACIÓNS PREVISTAS PARA A DOTACIÓN DUN
NOVO EDIFICIO PARA A FACULTADE DE MEDICINA E ODONTOLOXÍA**

27 ABR. 2016

COMPARECEN

Dunha parte, D. Jesús Vázquez Almuiña, conselleiro de Sanidade e presidente do Servizo Galego de Saúde, de acordo co establecido no artigo 34 da lei 1/1983, do 22 de febreiro, reguladora da Xunta e da súa Presidencia, e de conformidade cos Decretos 41/2013 e 43/2013, do 21 de febreiro, polos que se establece a estrutura orgánica da Consellería de Sanidade e do Servizo Galego de Saúde.

Doutra parte D. Juan Manuel Viaño Rey, Reitor da Universidade de Santiago de Compostela segundo nomeamento efectuado polo Decreto 62/2014, de 28 de maio (DOG de data 04/06/2014), actuando en nome e representación da mesma en virtude dos poderes outorgados polo artigo 20 da Lei Orgánica 6/2001, de 21 de decembro de Universidades, e do artigo 82 do Decreto 14/2014, de 30 de xaneiro, polo que se aproban os Estatutos da USC, con CIF Q1518001A, e sede Social no Pazo de San Xerome, Praza do Obradoiro s/n, 15782, Santiago de Compostela.

EXPOÑEN

1º) A Facultade de Medicina da USC, creada en 1648, ocupa desde 1928 un edificio na rúa San Francisco do casco histórico de Compostela, onde se trasladou desde o Colexio de Fonseca para estar preto do Hospital Real (entón Hospital Clínico).

Co tempo, as instalacións resultaron insuficientes para satisfacer o incremento da demanda de actividade clínica e asistencial, polo que se fixo necesaria a construción dun novo edificio para o Hospital Clínico que se ubicou na Choupana, inaugurándose en outubro de 1999 e que se coñece como Complexo Hospitario Universitario de Santiago de Compostela (CHUS).

2º) Como entón, e dada a conveniencia para a formación dos futuros profesionais sanitarios da existencia dunha proximidade física entre os servizos docentes e investigadores das Facultades de Medicina e Odontoloxía e de Enfermaría e o lugar en que se presta a atención clínica aos pacientes, converteuse nunha necesidade prioritaria e unanimemente admitida abordar o reto da dotación dunha nova Facultade de Medicina e Odontoloxía próxima á nova infraestrutura hospitalaria.



Posteriormente creouse pola USC a agrupación estratéxica Campus Vida, biocluster no campo das ciencias da saúde, alcanzando en 2011 a cualificación de Campus de Excelencia Internacional de referencia global.

En 2008, constituíuse mediante convenio entre o Servizo Galego de Saúde, a Consellería de Sanidade e a USC, o Instituto de Investigación Sanitaria de Santiago de Compostela (IDIS), que de seguido acadou a acreditación do Instituto de Saúde Carlos III, integrando a profesores de áreas clínicas da Facultade de Medicina e a persoal do Hospital, no que ten ubicada a súa sede.

3º) A USC construíu tamén nas proximidades do Hospital Clínico Universitario, o Centro Singular de Investigación en Medicina Molecular e Enfermidades Crónicas (CIMUS) que integra a grupos de investigación de profesores de materias básicas da titulación de Medicina (Fisioloxía e Anatomía, fundamentalmente), iniciando o seu funcionamento o mes de xaneiro de 2012, e o Centro de Biomedicina Experimental (CEBEGA), contiguo ao CIMUS, próximo a entrar en funcionamento, o que consolida o centro da actividade investigadora en materia biosanitaria no espazo que relaciona o Campus Vida e o Complexo Hospitalario Universitario.

4º) A impartición da docencia nas instalacións da rúa San Francisco, cando a actividade clínica e practicamente a totalidade da actividade investigadora se realizan no Campus Vida, ocasiona importantes disfuncións, o que converte en urxente a dotación dun novo edificio para albergar a Facultade de Medicina e Odontoloxía no entorno do Hospital Clínico Universitario, e incorporar no complexo e no actual Pavillón Docente as necesidades da Facultade de Enfermaría.

5º) De conformidade co previsto no artigo 126 da Lei 8/2008, do 10 de xullo, de Saúde de Galicia, as autoridades públicas competentes en materia de educación e sanidade establecerán un réxime de colaboración entre as universidades e as institucións sanitarias nas que se deban impartir ensinanzas universitarias, para os efectos de garantir a docencia práctica de medicina, enfermaría e outras ensinanzas que así o esixisen, mediante os oportunos convenios.

De conformidade co anterior, a Xunta de Galicia a través do Servizo Galego de Saúde, e a Universidade de Santiago de Compostela (USC), están interesados en traballar conxuntamente para a dotación dun novo edificio para a Facultade de Medicina e Odontoloxía da USC e a ampliación do hospital de Conxo para a reubicación dos servizos asistenciais do hospital Gil Casares.

6º) En aras a posibilitar a dotación dun novo edificio para a Facultade de Medicina e Odontoloxía a carón do Hospital Clínico Universitario, é preciso comenzar a elaborar os correspondentes proxectos que concretan as necesidades de execución correspondentes para acadar a infraestrutura docente a que este convenio se refire.



7º) A través do presente convenio, materialízase a colaboración entre as universidades e as institucións sanitarias nas que se deben impartir ensinanzas universitarias, para os efectos de garantir a docencia práctica de medicina, enfermaría e outras ensinanzas que a así o esixan, de conformidade co previsto no artigo 126 da Lei 8/2008, do 19 de xullo, de Saúde de Galicia

Cómpre ter en conta a concorrência de razóns de interese público e social, así como a especificidade técnica que require a cobertura das prazas docentes para asegurar a mellor formación para os futuros profesionais sanitarios, polo que resulta innegable o interese do Sistema Público de Saúde de contribuír á formación dos mesmos. A Lei orgánica 14/1986, do 25 de abril, Xeral de Sanidade, no seu artigo 104, estableceu as bases xerais do réxime de concertos entre as universidades e institucións sanitarias, determinando o marco normativo da colaboración entre ambas institucións mediante a subscrición dos correspondentes concertos para garantir os obxectivos docentes, asistenciais e de investigación.

Este espírito de necesaria colaboración foi recollido tamén na Lei 8/2008, do 10 de xullo, de Saúde de Galicia, que dedica o capítulo I do Título IX á regulación da docencia e formación, incidindo na necesidade de coordinación e colaboración entre as universidades e as institucións sanitarias en materia de educación e sanidade.

Tendo en conta os compromisos adquiridos nos instrumentos aos que nos temos referido anteriormente, unido ao feito de que se trata de formación regrada impartida exclusivamente en centros docentes do Sistema Universitario de Galicia, o réxime destas axudas encádrase no procedemento de concesión directa regulado nos artigos 19.4c) e 26 da Lei 9/2007, de 13 de xuño, de subvencións de Galicia.

En base ao exposto, ámbalas dúas partes recoñécense mutuamente a necesaria capacidade e acordan subscribir o presente convenio de colaboración de acordo coas seguintes

CLÁUSULAS

PRIMEIRA.- O obxecto do presente convenio é establecer a colaboración entre as partes para poñer en marcha o proxecto de construción dunha nova facultade de Medicina e Odontoloxía da USC, a carón do actual Hospital Clínico Universitario de Santiago de Compostela.

SEGUNDA.- A Universidade de Santiago de Compostela convocará no primeiro trimestre de 2016 un concurso para a realización do anteproxecto do novo edificio que albergará á nova Facultade de Medicina e Odontoloxía.

Dita convocatoria realizarase segundo o establecido nos artigos 184 a 188 do texto refundido da Lei de Contratos do Sector Público, aprobado por Real Decreto Legislativo 3/2011, do 14 de novembro (TRLCSP), que conteñen as normas especiais aplicables aos concursos de proxectos, en concreto na



modalidade que establece a letra b do apartado 2 do artigo 184, relativa aos concursos de proxectos con primas de participación ou pagos aos participantes, cunha previa selección de 5 participantes para a que se aplicarán criterios obxectivos, claros e non discriminatorios en base á cualificación do equipo redactor, á súa experiencia profesional e á calidade arquitectónica das obras que tiveran proxectado e realizado, e á metodoloxía de traballo que propoñan para abordar o proxecto e os seus requirimentos enerxéticos e construtivos.

De conformidade co previsto na letra d) do artigo 174 do TRLCSP, a redacción do proxecto básico contratarase ao gañador do concurso, por procedemento negociado sen publicidade no momento en que se dean as condicións que aseguren a viabilidade da execución do proxecto. Nese contrato poderán incluírse tamén os traballos de dirección na redacción do proxecto executivo así como a posterior dirección facultativa da obra.

TERCEIRA.- O Servizo Galego de Saúde colaborará no financiamento dos custos que xeren as primas de participación no concurso na contía máxima de 60.500 euros, con cargo á partida orzamentaria 5001 412A 744.1 do seu orzamento de gastos do exercicio 2016, na que existe crédito axeitado e suficiente.

A devandita cantidade destinarase a financiar os custos derivados do pagamento de cinco (5) primas do concurso de proxectos, a razón de 12.100 euros cada unha delas, na contía total de 60.500 euros, a facer efectiva no momento no que xurda a obriga para a USC de satisfacer as primas para os proxectos elixidos.

En canto aos gastos subvencionables atenderase ao disposto no artigo 29 da Lei 9/2007, de subvencións de Galicia. Consideraranse gastos subvencionables aqueles que de xeito indubidable respondan ao obxecto do presente convenio no período de vixencia do mesmo.

Para os efectos do previsto no artigo 46 e seguintes do Decreto 11/2009, ao remate do concurso de proxectos a USC presentará antes do 31/12/16 os documentos xustificativos que acrediten expresamente o destino e importe dos gastos efectivamente realizados.

Nos termos recollidos nos artigos 28 a 30 da Lei 9/2007, do 13 de xuño, de subvencións de Galicia, así como nos artigos 41 e 42 do Decreto 11/2009, do 8 de xaneiro, polo que se aproba o Regulamento da Lei 9/2007 do 13 de xuño de subvencións de Galicia a xustificación do cumprimento consistirá na certificación da intervención da USC ou do órgano que teña atribuídas as facultades de control da toma de razón en contabilidade e do cumprimento da finalidade para a que ten sido concedida.

Cando as actividades teñan sido financiadas, ademais de coa subvención, con fondos propios ou outras subvencións ou recursos, acreditarase na xustificación o importe, procedencia e aplicación de tales fondos ás actividades.



En calquera caso, as cantidades percibidas non poderán superar en ningún caso o importe das primas a satisfacer.

Así mesmo, a USC comprométese a facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas, no exercicio das súas funcións de fiscalización e control do destino das subvencións

O Servizo Galego de Saúde designará un representante no xurado ou órgano equivalente que se constitúa para a selección dos proxectos.

CUARTA.- De conformidade co artigo 13 da Lei 4/2006, do 30 de xuño, de transparencia e de boas prácticas na Administración pública galega e co previsto no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a sinatura do presente convenio suporá o consentimento expreso á Administración Autonómica, para incluír e facer públicos os datos referidos ao convenio nos Rexistros de Convenios da Xunta de Galicia, polo que a Consellería de Sanidade dará publicidade deste convenio na súa páxina web oficial e no rexistro público de axudas, subvencións e convenios e incluírá no rexistro público de sancións aquelas que se puideran impoñer como consecuencia do seu desenvolvemento.

QUINTA.- No caso de que dentro do exercicio orzamentario de 2016 se verifique a viabilidade da execución do proxecto, o Servizo Galego de Saúde e a USC establecerán os instrumentos que se consideren necesarios para financiar os custos de redacción do proxecto básico. En todo caso calquera compromiso de financiamento adicional esixirá un novo acordo entre as partes.

SEXTA.- Crearase unha comisión de seguimento deste convenio integrada por dous representantes de cada administración, á que lle corresponderá velar polo cumprimento dos compromisos acadados neste convenio, e a resolución das diferenzas que poidan suscitarse entre as partes ou que se orixinen pola interpretación das súas cláusulas.

A comisión de seguimento reunirase por solicitude de calquera das partes asinantes, considerándose constituída se asiste alomenos un representante de cada entidade.

SÉTIMA.- O presente convenio producirá efectos a partires da data da súa sinatura e manterase vixente ata o 31 de decembro de 2016, coa posibilidade dunha prórroga anual condicionada á existencia de crédito, no caso de resultar necesaria para o cumprimento do seu obxecto, agás denuncia expresa dalgunha das partes asinantes.

A modificación do presente acordo deberá ser aprobada polas partes, previo debate e discusión no seo da Comisión de seguimento.



A large, stylized handwritten signature in blue ink.

OITAVA.- Sen prexuízo das causas de reintegro previstas no Título II da Lei 9/2007, de subvencións de Galicia, o presente convenio poderase resolver por algunha das seguintes causas:

- a. Polo acordo expreso das partes asinantes, formalizado por escrito.
- b. Pola ausencia de convocatoria dos proxectos construtivos.
- c. Pola imposibilidade sobrevida do cumprimento das actividades descritas.
- d. Pola denuncia nas condicións previstas na presente cláusula.
- e. O incumprimento total ou parcial de calquera das súas cláusulas ou das obrigas recollidas neste convenio dará lugar ao reintegro total ou parcial das axudas recibidas e o xuro de demora correspondente de acordo co establecido no Art. 33 da Lei 9/2007, do 13 de xuño de subvencións de Galicia, e nos artigos 74 e seguintes do Decreto 11/2009, polo que se aproba o seu regulamento.
- f. A aplicación dos fondos outorgados a fins distintos dos que motivaron a súa concesión.

Toda alteración das condicións tidas en conta para a concesión destas axudas, e en todo caso a obtención de subvencións ou axudas outorgadas por outras administracións, entes públicos ou privados, poderá dar lugar, se con isto se alterasen os obxectivos deste convenio, á modificación dos importes das axudas.

NOVENA.- O presente convenio de colaboración ten natureza administrativa. As dúbidas que se presenten na súa interpretación e execución serán resoltas pola Comisión de seguimento. As partes quedan suxeitas á xurisdición contencioso-administrativa para a resolución de calquera conflito que puidera xurdir na aplicación do mesmo.

En todo o non disposto neste convenio será de aplicación a Lei 9/2007, do 13 de xuño de subvencións de Galicia, o decreto 11/2009 de 8 de xaneiro, polo que se aproba o Regulamento da lei 9/2007 do 13 de xuño e en canto non se opoña ao establecido na dita Lei, a Lei 38/2003, de 17 de novembro, xeral de subvencións .

As partes comprométense a cumprir e seguir este acordo de colaboración segundo o espírito que o fixo posible e, en proba de conformidade, o asinan en catro exemplares, e a un só efecto, no lugar e data indicados no encabezamento.

Polo Servizo Galego de Saúde


Jesús Vázquez Almuiña

Pola Universidade de Santiago de Compostela


Juan Manuel Viaño Rey